

## Senioren Tourenbericht

### **Oensingen - Balsthal**

31. Mai 2018

Tureleiterin: Sylvia Spring

Teilnehmer: 16; 8 Froue, 8 Manne

Mit em Zug si mir rassig uf Oensingen abe cho u hei Glück gha, dass mir a däm hütige Katholische Fiirtag no inere Auterssidlig zumene Gaffee si cho, wonis üses Yvonne zu sim 80. Geburtstag grad offeriert het. Merci vieumou!

Mir hei is nid lang versumt. Ds Gschpänscht vom hütige Tag hei mir i de grosse Näbuwuuche gseh u vor üs dä schteil Ufschtiag vo 400m het is ou Respäkt gmacht. Ds Schloss "Bechburg" wo shtouz a üsem Wägli zum Waud us gluegt het, isch üse erscht Wägwisser gsi. Aui Schtrössli u Pfade wo dä Hang dürzoge hei si sehr schön gsi u dr Waud het is vo dr langsam ufkommende Sunne dankbar beschattet. Mit eme guet apasste Seniorenschritt u wenige churze Haute si mir guet vorwärts u baud obe zum Waud us cho. Jetz het me scho ufe zum Bärgrestorant Rogge u witer hingerobe d`Roggeflueh gseh.

Hie si mir vorsorglich bim Wirt agmäudet, um bi weniger gäbigem Wätter aschtändig chönne z`verpflege. Är het is aber o hüt Plätz abote unis us em Rucksack lo ässe. Das sigi doch gschider, aus wemer i dene grosse Heumatte ringsume e grosse Egge göng go zbodehocke.

Dr Abschtiag hinger ache uf Balsthal isch äbeso happig gsi wie dr Ufschtiag vor uche. Nach em traversiere uf schteile Heumattewägli si mir obenab wieder rächt houperig dr Waud ab cho. Üsi Tureleitere het aber ds richtige Rezäpt agwändet: Ganz langsam aber trittsicher nidsi goh. So si aui guet ohni Chnöschlotter abe zu de bessere Wäge u füre zum Bahnhof cho. Es het sogar no guet zumene Bier glängt, bis mir wieder mit em Zug heigfahre si.

Zum Schluss e ganz hänzliche Dank üser Sylvia u hüt o spezieu em Wättergott. Dä weiss genau, wie viu Müeh, Arbeit, Wätterangst u Verantwortig ar Tureleitig hanget. So het är üs hüt wunderbar behüetet u het sini Wuuche, wo är äbe ou mues läre, nume i üser Umgäbig z`Bode gloh – merci vieumou!

Jseli H.U.